

Opšti uslovi za korištenje usluge podnošenja elektronske prijave za priznavanje patenta, dodjelu konsenzualnog patenta, upis proširenog evropskog patenta i izdavanje svjedodžbe o dodatnoj zaštiti, kao i podnošenje naknadnih podnesaka u vezi s navedenim postupcima pred Institutom (E-prijava patenta)

Uvod

Ovim Opštim uslovima reguliše se korištenje usluge podnošenja i upravljanja elektronskom prijavom za priznavanje patenta, dodjelu konsenzualnog patenta, upis proširenog evropskog patenta i izdavanje svjedodžbe o dodatnoj zaštiti kod Instituta za intelektualno vlasništvo Bosne i Hercegovine (*E-prijava patenta*), putem službene internet stranice Instituta za intelektualno vlasništvo Bosne i Hercegovine (u daljem tekstu: Institut).

Usluga podnošenja elektronske prijave za patente Instituta omogućuje korisnicima (u daljem tekstu: Korisnik) elektronsko podnošenje prijave u postupcima za priznavanje patenta, dodjelu konsenzualnog patenta, upis proširenog evropskog patenta i izdavanje svjedodžbe o dodatnoj zaštiti pred Institutom u elektroničkom obliku (u daljnjem tekstu: prijave za priznavanje patenta) korištenjem kvalifikovanog elektronskog potpisa.

Usluga podnošenja elektronske prijave za priznavanje patenta omogućuje Korisniku i podnošenje potrebnih naknadnih podnesaka koji su u vezi s prijavom za priznavanje patenta.

Za korištenje usluge podnošenja elektronske prijave za priznavanje patenta kod Instituta neophodno je da Korisnik posjeduje korisničko ime i lozinku koje dodjeljuje Institut nakon podnošenja pisanog zahtjeva od strane Korisnika, a uz ispunjavanje potrebnih uslova. Zahtjev za dodjelu pristupnih podataka može se dostaviti i putem elektronske pošte, s tim da u prilogu sadrži elektronski potpisan obrazac korištenjem ličnog kvalifikovanog elektronskog potpisa.

Značenje termina:

- Elektronsko podnošenje prijave podrazumijeva skup usluga namijenjenih podnosiocima prijave za priznavanje patenta koje omogućuju pokretanje postupka za priznavanje patenta u elektronskom obliku, u skladu s važećim propisima.
- Korisnik je svaka pravna ili fizička osoba koja pokreće postupak elektronskog podnošenja prijave za priznavanje patenta.
- Naknadni podnesci obuhvataju dopune/ ispravke određene prijave patenta, zahtjeve za upis promjena u registru prijave, dostavljanje dokaza o uplati, punomoći i sličnih podnesaka u postupku za priznavanje patenta u skladu sa Zakonom o patentu („Službeni glasnik BiH“, broj 53/10) i Pravilnikom o postupku za priznavanje patenta i konsenzualnog patenta („Službeni glasnik BiH“, broj 105/10, 91/16 i 66/26).

Ugovaranje korištenja usluge podnošenja elektronske prijave za priznavanje patenta

Korisnikom usluge podnošenja elektronske prijave za priznavanje patenta može postati pravna ili fizička osoba koja ispunjava tehničke preduslove za korištenje usluge i koja Institutu dostavi potpisanu Izjavu kojom garantuje da preuzima odgovornost u pogledu integriteta (autentičnosti) i identiteta potpisnika koji koristi kvalifikovani elektronički potpis za potpisivanje prijave za priznavanje patenta i naknadnih podnesaka u vezi s prijavom patenta kod Instituta, a kojom istovremeno prihvata ove Opšte uslove.

Korisnik može početi s korištenjem usluge podnošenja elektronske prijave za priznavanje patenta nakon što od Instituta dobije povratnu informaciju putem e-maila o odobrenju korištenja usluge s određenim datumom.

Tehnički preduslovi za korištenje usluge podnošenja elektronske prijave za priznavanje patenta su:

- pristup Internetu,
- instaliran odgovarajući internetski preglednik, te
- posjedovanje kvalifikovanog elektronskog potpisa.

Korištenje usluge podnošenja elektronske prijave za priznavanje patenta

Putem usluge podnošenja elektronske prijave za priznavanje patenta, Korisnik inicira online postupak podnošenja prijave za priznavanje patenta pred Institutom što omogućuje brže i efikasnije postupanje po podnesenoj prijavi.

Korisnik je saglasan da trenutkom podnošenja elektronske prijave za priznavanje patenta ima isti učinak kao i podnošenje prijave za navedene postupke u papirnoj formi u skladu s važećim propisima kojima se propisuje postupak za priznavanje prava na patent.

Podatke sadržane u prijavi za priznavanje patenta i naknadnih podnesaka vezanih za prijavu nakon unošenja elektronskog potpisa nije više moguće mijenjati.

Odgovornost i obaveze

Korisnik snosi punu krivičnu i materijalnu odgovornost za tačnost i vjerodostojnost podataka navedenih u elektronskoj prijavi.

Korisnik odgovara za sigurnost svojih tehničkih kanala komunikacije.

Institut ne odgovara za eventualno otkrivanje informacija iz prijave patenta prije nego što prijava bude evidentirana na serveru Instituta.

Institut ne snosi odgovornost za prekide u funkcionisanju usluga podnošenja elektronske prijave za priznavanje patenta koji nastanu zbog kvarova ili više sile.

Institut zadržava pravo da izvodi radove na održavanju svoje internet stranice i ove usluge u bilo koje vrijeme što može izazvati djelimičnu ili potpunu obustavu pružanja pojedinih ili svih usluga.

Otkaz

Započeto korištenje usluge podnošenja elektronske prijave za priznavanje patenta Korisnik može otkazati dostavljanjem pisane Izjave u kojoj jasno navodi da prestaje s korištenjem usluge podnošenja elektronske prijave za priznavanje patenta s tačno navedenim datumom i svim podacima u prijavi na koju se otkaz usluge odnosi.

Otkaz stupa na snagu s datumom sljedećega radnog dana od dana dostavljanja potpisane Izjave o otkazu korištenja ove usluge.

Institut će Korisniku onemogućiti pristup ovoj usluzi ako se utvrdi da je Korisnik na bilo koji način zloupotrijebio, odnosno neovlašteno pristupio ili pokušao pristupiti, odnosno uređivati podatke koji se obrađuju putem ove usluge. U slučaju onemogućavanja pristupa usluzi elektronske prijave patenta Institut će e-mailom obavijestiti Korisnika o navedenom.

Institut ne odgovara za štetu koja je nastala uslijed više sile, kao i svih sličnih uzroka čiji nastanak se ne može pripisati neopravdanim zahvatima Korisnika ili trećih osoba zbog kojih je došlo do nefunkcionisanja usluge.

Primjena Opštih uslova

Ovi Opšti uslovi objavljuju se na službenoj internet stranici Instituta <https://www.ipr.gov.ba>, a primjenjuju se od 22. 9. 2026. godine.

Institut zadržava pravo naknadne izmjene i dopune ovih Opštih uslova o čemu je dužan obavijestiti Korisnika objavom sadržaja izmjena i/ili dopuna istih na internet stranici Instituta.

Smatrat će se da je korisnik pristao na izmjene i dopune Opštih uslova ako u roku od 8 dana od njihove objave na službenoj internet stranici pisanim putem ne obavijesti Institut da ne pristaje na izmjenu i/ili dopunu Opštih uslova i da otkazuje korištenje usluge podnošenja elektronske prijave za priznavanje patenta s određenim datumom.

Rješavanje spora

Za sve sporove koji proizlaze iz ovih Opštih uslova korištenja utvrđuje se postupanje stvarno i mjesno nadležnog suda.